



18 JUL, 2025

Sindiket pasang 3 lapisan pintu besi, main bunyi burung

Harian Metro, Malaysia



Sindiket pasang 3 lapisan pintu besi, main bunyi burung

Alor Setar: Pasang tiga lapisan pintu besi dan main bunyi burung untuk tutup bunyi mesin. Itu antara taktik licik digunakan sindiket perlombongan bitcoin haram bagi mengaburi kegiatan mereka di bandar raya ini.

Helah terbabit terbongkar selepas pihak berkuasa menjalankan serbuan serentak ke atas tujuh premis sekitar Alor Setar dalam operasi khas bersama Suruhanjaya Tenaga, Tenaga Nasional Berhad (TNB) dan polis semalam.

Timbalan Menteri Peralihan Tenaga dan Transformasi Air, Akmal Nasrullah Mohd Nasir berkata, sindiket kini semakin kreatif dan berani dalam menyembunyikan kegiatan mereka malah tidak lagi gentar walaupun premis sudah banyak kali diserbu.

“Di salah satu premis, kita terpaksa memanggil bomba untuk pecah masuk kerana mereka memasang tiga pintu dengan begitu kukuh.

“Mereka juga menarik kabel dari pelbagai arah, ada dari sebelah kiri tangga, ada dari sebelah kanan bagi mengelirukan penguat kuasa,” katanya ketika ditemui selepas menyertai operasi berkenaan.

Akmal berkata, kegiatan haram itu bukan sahaja melanggar undang-undang tetapi juga amat berbahaya kerana membabitkan pengubahsuaian sistem elektrik secara tidak sah.

“Kita dapati mereka menukar fuis dan meningkatkan kapasiti bekalan elektrik daripada 200 ampere kepada 400 ampere sesuatu yang sangat mer-

bahaya.

“Ini boleh mengakibatkan kebakaran atau kerosakan sistem elektrik dan sudah tentu memberi risiko besar kepada penduduk berhampiran,” katanya.

Beliau berkata, di premis pertama pihak berkuasa menemui 80 mesin perlombongan bitcoin beroperasi secara serentak menggunakan tenaga tinggi.

“Setiap mesin ini menggunakan kuasa seperti satu penghawa dingin 2.5hp (kuasa kuda). Jadi bayangkan jika 80 mesin beroperasi serentak tanpa henti.

“Kos elektrik dicuri bagi premis ini sahaja dianggarkan mencecah RM86,000 sebulan,” katanya.

Beliau berkata, kerugian bagi ketujuh premis dalam serbuan operasi hari ini adalah dianggarkan RM273,679 sebulan.

“Kita akan teruskan operasi seperti ini dari semasa ke semasa kerana pencegahan hanya berkesan dengan tindakan berterusan dan kerjasama semua pihak.

“Fokus kita ialah hentikan kecurian tenaga dan pastikan keselamatan sistem bekalan untuk semua pengguna,” tegasnya.

Beliau turut menasihati pemilik premis agar lebih bertanggungjawab dan memastikan penyewa tidak menyalahgunakan bekalan elektrik secara haram.

“Gunakan prosedur *change of tenancy* (pertukaran hak sewa) di TNB supaya tanggungjawab penggunaan elektrik diserahkan kepada penyewa yang sah,” katanya.

“
Ini boleh mengakibatkan kebakaran atau kerosakan sistem elektrik
Akmal